

Preokupá pa Pòtmòni

Ultimo luna, hopi kos a wòrdu papiá tokante medida. Ma e palabra ku a dominá e tantísimo argumentonan, diskushonnan, i petishonnan no ta e palabra “medida”, no ta e inisialnan “OB”, ni e sifra “5%”. E palabra ku ta den mente di tur hende—maske kisas no vosiferá—ta palabra “**plaka**”! Pa ser mas eksakto “**MI plaka**”! Tur hende ta sumamente preokupá pa NAN pòtmòni.

Pa tantu tempu nos a gosa di un bon ekonomia. Nos a gosa di mas florin ku nunca den nos historia. Kompará ku otro pais —asta otro isla karibense—nos a biba riba un nivel haltu. Kisas e outo di 1996 ta den bon kondishon, pero na bo konsepto bo MESTER tin un kos di kareda mas nobo, mas espasioso, mas luhoso. Bo MESTER tin sierto paña pa lusi ku n’è. Maske tin kèts muchu mas barata, bo MESTER tin Nike, òf un otro marka renombrá. Bientu natural no ta sirbi mas; bo MESTER tin èrko pa freska e palasio ku bo ta yama bo kas. Bo no por bai ku fakansi na un “hermana” isla; bo MESTER bai Orlando òf asta Hulanda.

Ta opvio ku nos ta den gara di materialismo. Set pa sèn tin nos choká. Prioridatnan den bida a kai un banda. Nos ta asina “druk bezig” adorando e florin “todopoderoso” ku nos no tin tempu pa Dios. Mayornan no tin tempu pa yunan. Tin ku pone nan na krèsh pa mama por rondia mas plaka. Nos rikesa a produsí flohera. Nos a lubidá kon pa traha i tin ku importá stranheronan pa hasi nos trabou.

Ma aparentemente nos abundansia tabata artifisial. Ta sali na kla ku pa gran parti nos rikesa tabata **fiá...tantu riba nivel nashonal, insular, komo personal!** Awor ku a yega tempu pa paga bèk (sea ta ku 5% OB òf medida mas soportabel) nos ta grita, nos ta sapatia, nos ta protestá. Dikon? Pasobra e medidanan ta afektá MI prosperidat, MI pòtmòni!

Beibel tin rason ora e ta bisa “*amor pa plaka ta raís di tur sorto di maldat*” (1 Timoteo 6:10). Nos ta manera e mionario ku a ser puntrá kuantu sèn e mester tin pa e ta kontentu. El a respondé, “Un dòler mas!” Hopi hende tin e mentalidat ei. Semper un florin so falta pa nan ta kontentu. Ora nan ta hañ’è, ainda un heldu ta falta pa nan ta satesfasé.

Medidanan—pagando pa nos prosperidat—ta hasi nos malkontentu. Ma onestamente bisá, **prosperidat a hasi nos kontentu?** Hende ta mas kontentu awe ku 50 aña pasá ora no tabatin tantísimo fasilidat i prosperidat?

Palabra di Dios ta bisa, “*Si nos tin kuminda i paña pa bisti, ku esakinan nos mester ta kontentu*” (1 Timoteo 6:8). Kuantu kos bo mester tin pa bo ta kontentu? Segun e teksto aki, si bo tin kuminda i paña bo **por** ta satesfecho! Dios NO a bisa ku siertu marka di paña òf outo luhoso lo hasíbo kontentu. Kuantu kos di bèrdat ta NESESARIO den bida? Fuera di kuminda, paña, i (nos por agregá) un dak riba nos kabes, tur otro kos ta èkstra!

Nos tin ku realisá ku **alegria i satesfakshon ta un desishon konsiente ku bo ta hasi.** Bo por SKOHE pa ta kontentu APESAR DI SIRKUNSTANSIANAN maluku! Un aktitut di gratitut pa e poseshonnan ku Dios a dunábo ta un kalidat ku bo por desaroyá. **Bo por SIÑA ta kontentu ku e poko ku bo tin!**

Apòstel Pablo tabatin e mentalidat korekto, “*...mi a siña di ta kontentu den ki sirkumstansia ku mi hañami aden. Mi sa di biba humilde, i mi sa tambe di biba den prosperidat; den kualkier i den tur sirkumstansia mi a siña e sekreto di ta barika yen i di pasa hamber, tantu di tin abundansia komo di pasa nesesidat. Tur kos mi por den Kristo, Kende ta dunami fortaleza*” (Filipensenan 4:11-13).

Si bo aseptá Kristu den bo bida i ta biba conforme ku Su Palabra, bo asta por keda satesfecho ora medidanan ta afektá bo pòtmòni!